



КУРЧАК ТЕАТРЫШТЕ МОДЕШ

Кораксола ял гыч театр аланыште ыштыше эше ик самырык шўдыр яндарын йўла: тиде - Марина Фёдорова (снимкыште), Республикысе курчак театрын артист-кукловодшо. Мариан артист усталыкше школышто тунемме жапыштак палдырнен. Тудо Шўргыял кыдалаш школышто драмкружокыш коштын. Туныктышо Ольга Изосимовна Сергееван вўдымў кружокшо дене "Ший пўян Ший Пампалче" мари́й калык йомакым шындынт. Тушто Марина Вўдкуван рольжым модын. Каласаш кўлеш, артист Сергей Даниловын аваже - Татьяна Ивановна ден Мариан аваже - Зинаида Ивановна, акакшўжарак улыт. Садлан артист койыш нунын тукымыштак, вўрыштак уло, очыни.

"Чыным ойлаш гын, театр илыш нерген индешымше классыште шоненам, - каласкала Марина, - урокышто шинчымем годым ала-кузе тудо ушышкем толын пурыш, вара йўршын тидын нерген шонен омыл".

Латикымше класс деч вара Марина Фёдорова И.С.Палантай лўмеш тўвыра да сымыктыш колледжыш курчак театрын артистше специальностьлан тунемаш пура.

Тунемме жапше моткоч онайын, писын эртен кая. Мариан курчак театрыш артистлан пашаш налыт. Кумшо курс гычак театрыште модаш тўналеш. Икымше рольжо "Брат мой Каплик" спектаклыште Коля авалийын. Тудым районласе йочасадлаште ончыктеныт. "Принцесса на горошине" спектаклыште марионетке курчак дене Принцессым модын.

"Живой планыштат икмыняр роль лийын, но мылам тростевой курчак дене пашам ышташ лишылрак, - манеш Марина. - Сай але осал персонаж нерген ойлаш гын, утларакшым отрицательный геройым модаш йўратем. Тыгай роль нелырак. Вет геройым тичмашын осал манаш огеш



лий, тудын шке чынже, осал койышланат шке амалже уло. Тыгай персонажын чон шижмашыжым, тургыжланымашыжым умылаш, тудым шижын мошташ онайрак. Садлан тыгай рольым шукуырак моднем. Садикыште ик онай случай лийын. "Любопытный слонёнок" спектаклыште модмына годым ширме камвозын. Меже курчакна-влак дене ширме шенгелне шогымо. Йоча-влак мемнам ужыныт да пеш чот ырыныт.

Ме тиде эшкыкым вашке тўрлатышна да умбакыже модаш пижна".

Марина тўрлў онай роль-влакым модеш: "Любопытный слонёнок" спектаклыште Бегемотым, "Айболит" спектаклыште Чи-чи маймылым, "Бука" спектаклыште Бирли урым да молымат. Кугурак ийготан-влаклан спектакль-влак: "Бедный Акакий" (руки Петровича), "О рыбаке" (корак-влак, пырыс, кова) да молат.

Кызыт театрыште Анатолий Загорныйн "Зеленый Великан" пьесе-йомакше шындалтеш. Марина тушто Дроздыхан рольжым модеш. Тыгак Уильям Шекспирын "Двенадцатая ночь" спектакльым ямдылаш тўналыт, премьере ноябрь мушашыште лийшаш.

Марина Федорова театр илыш дене ила. Тудо курчакше-влакым пеш йўрата да перега. Артистке ятыр жапшым творчеством вылан пуа. Тидын годымак тўрлў книга лудаш йўрата, поснак детективым. Йолташыже-влак нергенат ок мондо. Канышлан ялышке ача-аваж деке толын кая.

Мариан ончыкылык планже кугу, эшеат сай да шукуырак роль-влакым модаш шона. Тек шонымашыже-влак шукталтыт.

Татьяна КИРИЛЛОВА,
Кораксола книгагудым
вуйлатыше

Фото-влакым еш альбом гыч
налме